

天文正義

卷卅六之卅九 奎宿占 婁宿占  
胃宿占 昂宿占

V  
F201  
K15

15



欽定天文正義卷三十六

奎宿占



奎宿占

史記天官書奎曰封豕為溝瀆正義奎十六星婁三星為降婁於辰在戌魯之分野奎天之府庫一曰天豕亦曰封豕主溝瀆西南大星所謂天豕目占以明為吉星不欲團圓團圓則兵起暗則臣干命之咎

宋史天文志西方奎宿十六星天之武庫主以兵禁暴西南大星曰天豕目亦曰大將明動則兵水大出



觀象玩占奎十有六星一曰天庫一曰天邊金星也其下九尺為日月五星中道西南大星為女令石氏曰奎主庫兵禁不時故置將軍以領之奎又主溝瀆故將有陂池江河之事皆占於奎奎大星欲其明明則天下安芒角動搖國必用兵或曰有赦天豕目主水瀆動則有水以日占國管窺輯要古云東壁二星及文章之府誤以奎壁二星為文章之府耳宋五星聚奎實在奎壁間故以為文明之兆

按奎宿十六星其最南一星亦在黃道北十二度半月五星皆不及犯觀象玩占謂其下九尺為日月五星中道即以最南一星言較今測差少三度半

彗孛客星見奎宿

漢書天文志燭星見奎婁間占曰有土功胡人死邊城和

宋史天文志彗犯奎為饑為兵喪出則有水災星孛於奎其下兵出民饑出則西北有兵起客



星犯奎有溝瀆事守則王者有憂軍敗賊臣在側  
入之破軍殺將舍留不去人饑出則為謀臣惑天  
子

觀象玩占彗孛出奎石士曰西北起兵諸侯與夷  
狄相應兵大起有喪大水一曰有廢立魯地兵起  
彗孛犯奎大饑國君出戰彗貫奎庫兵悉出禍在  
強臣 客星出奎大水災中國亂一曰國兵出巫  
咸曰邊兵起白衣自立為王刀劍貴石氏曰有矯  
命出使者赤星出奎外夷動兵赤黑有破軍赤星

守奎兵起客星守奎郝萌曰臣有以巧偽惑天子  
者又曰天下修兵有殺霜不時下牛疫六畜貴黃  
帝占曰糴賤荊州占王者憂一曰魯國起兵一曰  
軍在外者敗客星留舍奎不去天下饑布帛貴入  
之石氏曰外夷起兵麻象貴甘氏曰強國爭地荆  
州占曰土工大興陳卓曰武庫之臣有罪黑星入  
奎有溝渠事黃星入奎土工興宮中有變赤星逆  
行從婁至奎兵起

天文會通彗星干奎除舊冥新其野大亂一曰彗



星出奎其分有災疫又彗在奎火焚武庫亦主失地  
孛星守奎武庫壞出奎大將死又曰大水孛星犯奎溝瀆大水又曰大將軍失利

流星出入奎宿

宋史天文志流星入犯奎有溝瀆事破軍殺將乙巳占流星出入色黃白光潤文昌武偃赤如火光作聲為弓弩用一曰入則有聚衆事

觀象玩占流星犯奎乙巳占曰武庫用事春夏犯金草興秋冬犯百川溢流星入奎有溝瀆之事於

國內出奎有溝瀆之事於國外

天文會通流星入奎諸侯有來使色青則有大將來歸者出奎則君使人於諸侯

雲氣出入奎宿

宋史天文志赤雲氣入犯奎為兵黃為天子喜黑則大人有憂

觀象玩占蒼白雲氣出奎有兵入奎天下婦人有災赤氣入奎有偽使一曰有無所受命而來者出奎有詐出使者黃雲氣入奎中有貢珠玉珍寶者



出奎珍寶有出者赤氣入奎天下婦人多血疾黑  
氣入奎有疾疫

天濶

宋史天文志天濶七星在外屏南主天廁養豬之  
所一曰天之廁濶也暗則人不安移徙則憂  
觀象玩占天濶七星在屏南天廁也其星不見則  
人不安多疾病

天文會通天濶星明濶而光澤則天下無失業之  
民星踈圻則天下民流亡星就聚則民聚為盜暗

則民不安居又曰明則六畜盛暗則六畜疫死

按天濶古謂七星今只四星其最北一星亦在

黃道南十三度強月五星皆不及犯

彗孛客星見天濶

天文會通彗星干犯天濶不有亡國必有死君

星孛天濶其國有兵喪民聚為亂 客星干天濶

外兵入塞客星抵天濶盜賊四起

流星出入天濶

天文會通流星抵觸天濶民不安居



雲氣出入天淵

天文會通黑雲氣入天淵良民為盜黃氣入之下民有暴貴者青氣入之民多獄訟赤氣入之民失業

土司空

宋史天文志土司空一星在奎南一曰天倉主土事凡營城邑浚溝洫修隄防則議其利建其功四方小大功課歲盡則奏其殿最而行賞罰星大色黃則天下安

觀象玩占土司空一星地官也主水土之事知歲禍福其星明大黃潤則天下安不明若亡不見則國有喪角動則土功興微暗則有旱災

按土司空一星在黃道南二十一度弱月五星皆不及犯

彗孛客星見土司空

宋史天文志彗客犯土司空水旱民流兵大起土功興客星守之有土功哭泣事

觀象玩占彗孛出土司空兵大起工役興一曰大



將軍憂 客星入守土司空工役大興男女不得耕織天下大疾石氏曰旱出之外臣憂夷狄兵起人民愁苦徭役守之宮中有哭泣事

天文會通彗掃土司空天下多更造宮宇 星孛土司空其國有喪

流星出入土司空

觀象玩占流星抵土司空兵起土工興

天文會通流星抵犯土司空其國有兵恐流星出土司空天子遣使治水土功

雲氣出入土司空

宋史天文志黃雲氣入土司空土工興移京邑

天文會通黑雲氣入土司空大水傷禾稼白氣入之興兵役禦水患赤氣入之旱黃氣入之民安青氣入之歲饑

策星

史記正義策一星在王良前主天子僕也占以動搖移易在王良前或居馬後則為策馬策馬而兵動也



宋史天文志策一星在王良北天子僕也主執策御

觀象玩占策一星巫咸曰策主天子兵馬金官也其星動搖則天子出移徙居馬後亦謂之策馬有大兵起

天文會通策一星天子僕御也一曰王良之御策也星小明而黃潤則車駕安明大出怒角左右賤臣有匿謀

按策一星在黃道北四十九度弱月五星皆不

及犯

彗孛客星見策星

宋史天文志彗孛客星犯策星皆為大兵起天子自將於野近之下有謀亂者觀象玩占客星守犯天策兵大起天子自將一曰客星守下有謀人主不可出宮

天文會通彗出策星旁僕廝有變謀彗孛策星僕以兵叛客星入犯策星僕廝通外奸有慝謀流星出入策星



天文會通流星出策星僕御以罪見逐

雲氣出入策星

天文會通黑雲氣入策星賤臣起兵白氣入之僕御有離心黃氣入之賤臣受賞

附路

宋史天文志附路一星

附一作傳在閣道南旁別道也

一曰在王良東主太僕主禦風雨芒角則車騎在野星亡有道路之變不具則兵起

觀象玩占附路一星所以備閣道之敗缺一曰伯

樂主掃除主禦風雨一曰附路太僕之象石氏曰附路以通道備不虞星明則人主昌民不殃亡不見則道路塞

按附路一星在黃道北四十五度弱月五星皆不及犯

彗字客星見附路

宋史天文志彗字犯附路道路不通客星入馬賤

觀象玩占彗字出附路天下饑兵起人主自臨兵



客星犯附路天下半隔入之兵大起出附路巫咸曰馬當賤若守之太僕以馬得罪

流星出入附路

觀象玩占流星抵附路太僕有憂馬多死若馬大出

雲氣出入附路

宋史天文志蒼白雲氣入附路太僕有憂赤為太僕誅黃白太僕受賜黑為太僕死

觀象玩占赤氣出附路兵起黃白氣出之有德令

閣道

史記天官書後六星絕漢抵營室曰閣道索隱絕度也抵屬也又按樂汁圖徵云閣道北斗之輔石氏云閣道六星神所乘也正義漢天河也直度曰絕抵至也閣道六星在王良北飛閣之道天子欲遊別宮之道占一星不見則輦路不通動搖則宮掖之內起兵也

宋史天文志閣道六星在王良前飛道也從紫宮至河神所乘也一曰主輦閣之道天子遊別宮之



道也星不見則輦路不通動搖則宮掖有兵  
觀象玩占閣道六星在王良前從紫宮至河王良  
旗也一曰紫宮旗水官也主捍難滅咎石氏曰閣  
道形如飛閣從紫宮北出至河上天之御道神所  
乘也主道路其星行列正直而明則人主吉天下  
安不具則御道不通

天文會通閣道星變色出怒角天子無出宮

按閣道六星其最南一星亦在黃道北三十九  
度強月不星皆不及犯

### 彗字客星見閣道

後漢書天文志閣道紫宮天子之宮也客星犯入  
留以爲大喪

宋史天文志彗字客星犯閣道主不安國有喪  
觀象玩占彗字出閣道御道中有伏兵犯之道路  
不通 客星出閣道王者不可私行犯之閣道中  
有伏兵天子戒之

天文會通彗星掃閣道兵叛 星字閣道車騎滿  
野 客星彗字犯守閣道宮禁驚兵草起



流星出入閣道

觀象玩占流星犯衝閣道天子戒出入

天文會通流星犯閣道帝王巡狩

雲氣出入閣道

宋史天文志白雲氣入閣道有急事黑主有疾黃則天子有喜

天文會通黑氣入閣道其國有兵

王良

史記天官書漢中四星曰天駟旁一星曰王良王

良策馬車騎滿野

宋史天文志王良五星在奎北居河中天子奉車御官也其四星曰天駟旁一星曰王良亦曰天馬星動則車騎滿野一曰爲天橋主禦風雨水道星不具或客星守之津梁不通與閣道近有江河之變星明馬賤暗則馬災

觀象玩占王良五星一曰天津一曰王濟天子奉車渡水之官也荊州占曰王良爲西橋或占車騎或占津梁石氏曰王良星移則有兵荊州占曰王



良與馬齊則天下大急郝萌曰王良向造父則馬  
賤又曰四馬芒角天子自將兵又曰王良天駟皆  
明則馬吉移徙失色則馬有災

按王良五星其最南一星亦在黃道北四十五  
度半月五星皆不及犯

彗孛客星見王良

宋史天文志彗客犯王良爲兵喪天下橋梁不通  
觀象玩占彗孛出王良天子好馳遊奉車反兵大  
起馬多死天下急關津不通犯之占同 客星入

王良將士皆亡守之兵馬大動民疾病

天文會通彗孛客星近王良不宜出宮有謀亂

流星出入王良

宋史天文志流星犯王良大兵將出

觀象玩占流星入王良有急兵起

天文會通流星出王良天子車駕動

雲氣出入王良

宋史天文志青雲氣入犯王良奉車憂墜車雲氣  
赤有斧鑕憂



觀象玩占蒼白氣入王良憂墜車馬奉車憂出之  
禍除赤氣入王良太僕奉車誅赤氣中駟馬兵起  
赤氣出車騎滿野黃氣入奉車拜賜天子有喜諸  
侯有獻馬者一曰有神馬見黃氣出天子出車馬  
賜諸侯王黑氣入奉車太僕死  
天文會通白氣入王良兵起亦爲火災

外屏

宋史天文志外屏七星在奎南主障蔽臭穢  
觀象玩占外屏七星在奎南以蔽天溷其星不見

或移徙則民人失業

按外屏七星第一星在黃道北二度強第二星  
在黃道北一度第三星在黃道南十三分月五  
星皆及犯之第四星在黃道南三度月與火土  
金水四星及犯之第五星在黃道南五度弱月  
與火金二星及犯之第六星在黃道南八度第  
七星在黃道南九度惟金星及犯之史志占書  
皆未載其象占

彗孛客星見外屏



天文會通彗孛客星干犯外屏邊城不守屏障多  
壞亂兵將起

流星出入外屏

天文會通流星抵觸外屏黎民失業

雲氣出入外屏

天文會通黑雲氣入外屏其國邊境兵擾白雲氣  
入之其國有急兵

軍南門

宋史天文志軍南門在天大將軍南天大將軍之

南門也主誰何出入星不明則外國叛動搖則兵  
起明則遠方來貢

觀象玩占軍南門一星在天大將軍西南不見則  
兵亂不通

天文會通軍南門一星乃軍營之南門今之轅門  
也大象曰南門列轅而出衆又曰主呵叱出入以  
防盜賊易曰重門擊柝以待暴客亦此意也其星  
明正則軍門肅靜寇盜不入遠方來貢不明移徙  
夷狄反叛亂兵大起



按軍南門一星在黃道北三十六度強月五星  
皆不及犯

彗孛客星見軍南門

天文會通彗孛入犯軍南門其國兵亂互相誅戮  
客星入守軍南門外奸入軍營

流星出入軍南門

天文會通流星犯軍南門則外寇入國境一曰外  
奸入營中

雲氣出入軍南門

天文會通黑雲氣入軍南門軍士有離心白氣入  
之其野有屠城一曰有潰軍赤氣入之軍營有火  
災青氣入軍士饑